

Regulativ d'alp digl cumegn da Sur

I. Scopo

Art. 1

Scopo suprem da chest regulativ è da dar pastgira suffizainta alla biestga digls vaschigns e domiciliias.

Pinavant definescha el las cumpetenzas digls organs, regla igl carger e la habilitad dallas alps, fixescha igls dretgs da pasculaziun, igls costs e las taxas, e definescha obligaziuns e dretgs digl persunal d'alp. Chest regulativ vala per igl antier territori digl cumegn da Sur.

II. Igls organs

Art. 2

Organ suprem è la radunanza communal, sagond la suprastanza communal e terz la cumischung d'alp.

Art. 3

La radunanza communal eligia 2 commembers ainten la cumischung d'alp tenor lescha communal. Ella decida er digl dar a tschains l'alp e fixescha las taxas d'ervadi.

Art. 4

La suprastanza communal survigilescha la cumischung d'alp. Ella eligia ord sies mez igl president dalla cumischung d'alp.

Art. 5

La cumischung d'alp cumpeglia president, actuar ed en assessour. Ad ella è surdada l'administraziun dall'alp. Ella procura e survigilescha la servited d'alp, è responsabla per las sieranzas digl persunal d'alp, procura per igl quantum biestga d'alpger, igls lis da pasculaziun, igl pavel e la cultivaziun dall'alp.

III. Igl carger

Art. 6

Noua carger las differentas categorias da biestga decida la cumischung d'alp, schinavant tgi chegl è betg fixo ainten chest regulativ.

Art. 7

L'alp da vatgas è Salategnas. Noua pascular l'otra biestga decida la cumischung d'alp. Sur digl manar chint autonom decida la suprastanza communal.

Art. 8

Igls termins dalla cargeda e scargeda vignan decidias dalla cumischung d'alp.

Art. 9

Digl adiever da pastgiras, casadas e digls termins decida la cumischung d'alp. La cumischung d'alp decida er digl sorteir ord prada.

Art. 10

Vaschigns e domiciliias èn obliias d'inditgier alla cumischung d'alp anfignen igls 1. da mars igl domber da biestga tg'els on an senn d'alpager.

Biestga betg annunztgeida pò angal neir alpageda schinavant tgi la habilitad dallas alps vign betg surpassada. Per biestg annunztgia, tgi vign betg alpagea, paia igl possessour ena puniziun da 100.00 fr. Schinavant tg'el so mutivar igl cass, vign el delibero dalla puniziun. Instanza penala è la suprastanza communal.

Habilitad dallas alps

Art. 11

L'alp da Salategnas pò neir cargeda cun max. 38 vatgas da latg.

Art. 12

Per las otras pastgiras procura la cumischung d'alp ena cargeda suffizianta.

Dretgs da pasculaziun

Art. 13

Dretgs da pasculaziun on vaschigns e domiciliias.
Tot las seivs moviblas on da neir allontanadas anfignen igls 30 da november.

Art. 14

Dimora purila on tots chels tgi magnan en travagl puril sen territori digl cumejn da Sur.

Repartiziun digls costs e taxas

Art. 15

Igl chint vign mano dalla canzleia communal.

Art. 16

Las categorias d'anvernadas vignan chintadas scu talas dalla dumbraziun federala da biestga digls 3 da matg.

Las taxas per biestga d'orsoura fixescha la suprastanza communal.

Biestga indigena per anvernada:

a) taxas d'alpager: 50.00 fr. b) taxas d'ervadi: 30.00 fr.

Art 17

Schi en biestg ò da neir allontano digl movel igls amprens 10 deis, vign igl possessour delibero da taxas d'ervadi e paias. Anfignen igls 15 d'avost ò'l da paer taxa e mesa paia, siva digls 15 d'avost taxa e paia antiera.

Igls costs per transport da biestga disgraztgeda porta igl possessour.

Art. 18

Mintga pour indigen è obliia da cultivar las pastgiras 8 ouras per mintga 10 anvernadas. Els vignan paeas tenor schurnada da cumegn. Chels tgi vignan betg siva a chella obligaziun, on da metter en om u paer la schurnada agl cumegn.

Igls costs per far aint igl fagn, ladar e far se lagna per l'alp von a chint dall'alp.

Obligaziuns e dretgs digl personal d'alp

Art. 19

La cumischung d'alp survigilescha igl inventari dallas mobiglias dall'alp. Ella controllescha igl inventari igls deis dalla cargeda e scargeda.

Art. 20

Signung e pastreglia on d'infurmar igl president dalla cumischung d'alp da tot igls fatgs pi impurtants, numnadamaintg da difficultads cun possessours da biestga u otras reclamaziuns.

Art. 21

Anfignen igls 15 d'otgover ò igl personal d'alp d'allontanar sen l'alp tot las seivs da feildarom e d'aveir exequia tot las otras lavours descretgas ainten chest regulativ.

Art. 22


Igls albierts dall'alp stattan angal an disposiziun pigl travagl d'alp, schinavant tg'igl cumegn u la suprastanza communal decidan navot cuntrari.

Determinaziuns finalas

Art. 23

Igl preschaint regulativ aintra an vigour cun l'approvaziun dalla radunanza communal digls 21.7.2004 e ramplazza tot igls vigls regulativs d'alp.

igl mastral:
Michael Luzio



l'actuara:
Maria Pia Signorell-Daguati

